

DOMINGU III TEMPUS ADVENTU – TINAN C

Tema Domingu datoluk Tempus Adventu nian

Tema Domingu ne'e nian hale'u lia-husun ida: “**no ami, sá loos mak tenke halo?**” Prepara “dalan” husi ne'ebé Na'i sei liu signifika husik ita-nia limite sira, ita-nia egoizmu no komodizmu no halo transformasaun loos moris nian tuir Maromak nia konvite.

Evanjellu sujere aspetu tolu iha-ne'ebé transformasaun ne'e nesesária duni: presiza sai husi egoizmu no aprende fahe; presiza harahun eskema sira esplorasau no imoralidade nian no hakat ba oin ho justisa; presiza hakribi violénsia no prepoténsia no respeita maun-alin sira-nia dignidade. Evanjellu aviza mai ita mós, katak ema sarani “simu batizmu iha Espíritu”, simu husi Maromak moris foun no tenke moris tuir dinámika ida-ne'e.

Leitura dahuluk sujere katak, iha dalan konversaun nia inísiu, klaran no rohan, Maromak ne'ebé hadomi ita hein hela ita. Nia domin la perdua de'it ita-nia salan sira, maibé provoka konversaun, nakfilak ita no hafoun ita. Husi ne'e mak mai konvite ba ksolok: Maromak iha ita-nia leet, hadomi ita no, apezarde buat hotu, nia insiste atu halo dalan ho ita.

Leitura daruak insiste kona-ba atitude loos sira ne'ebé tenke marka ema sira ne'ebé hakarak simu Na'i iha sira nia moris: ksolok, laran-di'ak, orasaun.

LEITURA I – Sof 3,14-18a

Profeta Sofonias haklaken iha Jerusalém, durante faze dahuluk Josias nia ukun nian (sé. VII mK). Iha tinan ruma antes liurai aat Manassés loke país ba povu viziñu nia kostume sira, harii altár ba Maromak estranjeiru sira (nia tau iha templu Jerusalém nian maromak feto Astarte nia ilas), buka matan-dook nst. Maski liurai Josias buka troka situaun no promove reforma relijioza, maibé iha Sofonias nia tempu Manassés nia salan sira sei hatudu ninia influénsia. Iha kontestu ne'e mak Sofonias ataka idolatria kultu nian, materializmu, atensaun laek ba vida relijioza, abuzu autoridade nian: ne'e mak situaun grave infidelidade nian ba “alianza”. Nia mensajen la'ós de'it kastigu nian maibé mós apelu ba konversaun, ain-hakat dahuluk ba salvasaun.

MENSAJEN

Testu propoin mai ita konvite ba ksolok, tanba Maromak hasai tiha kondensaun ba Judá. Maromak nia domin manán tiha. Husi ohin ba oin Maromak sei horik iha nia Povu nia leet; no komuñau foun entre Jahwéh no Judá maka garantia seguransa nian, ksolok nian no moris nakonu nian. Liután, Maromak nia domin sei hafoun Povu nia fuan no halo atu Judá fila fali ba dalan “alianza” nian, no Maromak rasik sei haksolok ho transformasaun ne'e.

LEITURA II – Filip 4,4-7

Paulo, iha dadur-fatin, simu ajuda fraterna husi Filipense sira. Nia retribui ho surat ida ne'ebé hatudu ninia domin ba komunidadade sarani Filipos nian. Agradese tiha Maromak ba Filipense sira-nia sensibilidade ba anúnsiu Evanjellu nian (kf. Flp 1,11), informa tiha komunidadade kona-ba ninia situasuan pesoál (kf. Flp 1,12-26), dirije tiha ezortasaun oioin ba komunidadade (kf. Flp 1,27-2,18), fó tiha notísia kona-ba Timóteo no Epafródito (kf. Flp 2,19-30) no

denunsia tiha akuzasaun ne'ebé ninia funu-baluk sira halo (kf. Flp 3,1-21), Paulo – konxiente katak comunidade seidaok perfeita – nia apresenta rekomendasaun ruma ho karákrter práktiku.

MENSAJEN

Rekomendasaun dahuluk no importante liu mak konvite ba ksolok. Ne'e mak buat ruma fundamentál, ne'ebé Paulo repete dala rua iha versíkulu ida: “haksolok bá”. Liafuan uza iha-ne'e mak verbu “khairô” lori ba ksolok “khara” ne'ebé anju sira haklaken ba bibi-atan sira kona-ba Jezús nia moris iha Belein. Nune'e, ksolok mak rezultadu husi Na'i Jezús nia prezensa ne'ebé salva iha ema sira nia leet. Hafoin, Paulo hatutan tan rekomendasaun seluk: laran-dia'k ka bondade, konfiansa, orasaun (súprika no agradesiemntu nian). Ne'e mak atitude ruma ne'ebé tenke akompaña sarani sira bainhira hein Na'i atu mai: ksolok, basá ninia libertasaun atu to'o daudaun; toleránsia ba maun-alin sira; konfiansa iha Maromak; diálogu ho Maromak, hodi agradesese ba don hotu no apresenta ba Nia difikuldade no terus sira hotu.

EVANJELLU – Lc 3,10-18

Evanjellu ohin nian mak kontinuasaun husi domingu kotuk: profeta Juaun Batizta hatudu ho detalhe konkretu no ba grupu konkretu, oinsá halo dalan “metanoia” nian no prepara ba “Na'i ne'ebé atu mai”.

MENSAJEN

Parte dahuluk Evanjellu ohin nian (vers. 10-14) mak sesaun ida partikulár Lucas nian. Halo ema sira husu “sá mak ami tenke halo” ne'e Lucas ninia karakterístika (kf. Apost. 2,37; 16,30; 22,10): sujere abertura ida ba proposta salvasaun nian ne'ebé mai husi Maromak. Juaun Batizta propoin atitude konkreta tolu ba sira ne'ebé hakarak halo esperiénsia konversaun no enkontru nian ho Na'i ne'ebé mai: ba povo baibain, Juaun Batizta hameno atu iha sensibilidade ba ema sira-ne'ebé la iha buat ida nia presiza no fahe ho sira sira-nia soin; ba ema publikani sira, nia husu atu keta esplora, atu keta buka konvinse an ho eskema hariku an laho dalan loos, atu keta na'ok ema kiak sira; ba soldadu sira, nia husu atu keta uza violénsia, atu keta uza abuzu poder nian hasoru ema fraku no defeza-laek... Haree took oinsá Juaun Batizta hatudu krime sira hasoru maun-alin sira: buat hotu ne'ebé ba kontra ema ida de'it nia moris mak krime ida kontra Maromak; sé mak halo ida-ne'e taka nia fuan no nia moris ba proposta libertadora ne'ebé Kristo lori mai.

Iha parte daruak Evanjellu nian (vers. 15-18), Juaun Batizta haklaken batizmu iha Espíritu Santu ne'ebé atu mai, la hanesan ho batizmu “iha bee” Juaun nian. Juaun nia batizmu mak, proposta ida konversaun nian; maibé Jezús nia batizmu konsiste iha simu Maromak nia moris ne'ebé halo ema nakfilak husi laran, husi ema tuan ba ema foun, halo ema ne'ebé egoísta sai ema foun, ho kbiit atu fahe moris no hadomi hanesan Jezús. Iha ne'e nia halo referénsia ba transformasaun ne'ebé Kristu hala'o iha ema sira nia fuan. Ba sira ne'ebé prontu atu simu ninia proposta libertasaun nian: sei hetan moris foun ida ne'ebé hetan purifikasaun husi ahi. Moris foun ida iha-ne'ebé salan no egoísmu la hetan ona fatin, moris ida tuir Maromak nia dalan. Ba Lucas, anúnsiu profétiku Juaun nian sei konkretiza didi'ak iha Pentekostes.